

醫

賸

全

亥 22

23-12



卷

醫

賸

三



中醫之精湛淵博。漸爲世界所注意。然歐美之所研究者藥物而止。日本則進乎理論之探討。歐美之所獲者僅當最近期間。日本則遠在明治維新之前。因維新而廢漢醫。因廢漢醫而感受西方醫學之不完美而復有復興皇漢醫學之舉。則其甘苦備嘗。中西醫價值之比較。尤爲親切顯著焉。是故我國醫界欲求改進。最適宜之參攷。厥爲日本漢醫之述作。本局有鑒於此。爰有皇漢醫學編譯社之組織。廣求彼土之名著。以供他山之攻錯。先印聿修堂醫學叢書十三種。書爲丹波元簡畢生心血之所聚。攷古精覈。持理平正。方藥純粹。審定謹嚴。求之我國。鮮出其右。宜乎楊守敬稱其有三美。洵非虛語也。印竣爲述崖略。以告世之愛護而有志中醫者。嗣後會當陸續編譯。以期蔚爲大成。發揚中醫。鞏固中醫。倘其嚆矢乎。

中華民國二十四年十月上海中醫書局謹誌



醫賸目錄

余辛酉冬被黜於外班。公事頗閑。然日省病家。不遑寧處。唯每燈火可親之候。取壯時所筆記爲之編刻。顏曰醫賸。以仰正於來哲。櫟蔭拙者。

上卷

神農嘗藥

先天後天

三陰三陽

內經之文似諸書

巫醫

伊尹湯液

醫學

三皇廟

醫科

呂元膺論醫

天醫

解臚穿胸

扁鵲墓

黃帝時有倉公

三折肱

以偏得名

王叔和

王冰

朱葛齊名

運氣

對脈

息數不同

輕身延年

藥物所出



王冰引月令

記性

玉房

手檢圖

劉菽

活人書

中風

中卷

病分左右

病從口鼻入

寒熱異治

魑記魑之訛

讓

背陽腹陰

解剖藏府

性命之根

詹王論脈

千金方

儒門事親

痰

草子

瘴名不一

廉瀝

葶姑

鄭聲

動氣

少腹

診脈借菽

初學診脈

聖濟總錄

妄改書名

吹雲

瘴母有二

肺焦黃胖

痰

登豆瘡



寧夏中醫藥大學圖書館版權所有

社公

野鷄

臘梨

狐臭

悶臍生

癩

離

癩

文字从疒

護項

賊風

霧首溫足

羹上肥

劑頸

消息

索餅

黃龍湯

震氣

砒毒

八月生子

古方

復古

藥劑

診腹

醫字音

福醫藥案

錫錫

左右齊診

文人叵信

草藥

引線候脈

一貼

一週

高緩

艾師

果子藥

矢醫

衣上出火

同身寸



針下胎

針不出

八脈名義

脫文校補

紙鳶放鵠

瘡毒發痢

縊死用藥

雙睛突出

疥蟲

鵝血治噎

癰瘡

針入肉中

辟穀丹

種痘

五雲子

卜齋

俞璉書

瞽醫

知時捷法

虎咬

蒙汗藥

金箔治杖瘡

丹藥

六一泥

刀圭

三建

驅馬丹

中毒昏眩

下卷

紫色

鶻突

藥用後竅

兒啼於腹中

茶功

若木瘡



鍾馗

廣東人參

人蘘芪胡

肉豆蔻

薏苡枸杞

龍骨

礬礬之訛

甜露雀餚

鮓答

白酒

附錄

募原考

梅雨考

龜板

刨參

生金腦子

牧靡

陳廩米

蟾酥

笑菌

馬肉

樟木蟲

靈貓

銅人圖經考

附銅像考

冬蟲夏草考

人參生熟

紫河車

土中燐子

茯苓

滑石

杭有二種

孔雀尾有毒

底野迦

靈柴

烟草

屠蘇考

吸毒石考



南京中医药大学图书馆版权所有

醫賸卷上

聿修堂醫學叢書
第十種

櫟蔭拙者 著

神農嘗藥

孟子載爲神農言者許行。而不言及醫藥。神農嘗百草製醫藥。世多引淮南子爲證。余嘗攷淮南文。殊不然矣。曰古者民茹草飲水。采樹木之實。食羸蠃之肉。時多疾病毒傷之害。於是神農乃教民播種五穀。相土地宜。燥濕肥瘠高下。嘗百草之滋味。水泉之甘苦。令民知所避就。當此之時。一日而遇七十毒。此其嘗百草爲別民之可食者。而非定醫藥也。乃神農之所以稱農也。陸賈新語曰。民人食肉。飲血衣皮毛。至神農以爲行蟲走獸。難以養民。乃求可食之物。嘗百草之實。察酸苦之味。教民食五穀。亦可以證矣。而其云神農定百藥者。昉見世本。而鄭玄周禮註。神農子儀之術。蓋其說之來尙矣。而孔叢子云。伏羲嘗味百藥。乃在神農之前。楊朱云。五帝之事。如覺如夢。矧於三皇之事。要之不可

太平御覽引



知亦不可窮而已。及讀劉青田醫說曰。天地闢而人生蠢蠢焉。聖人出而後異於物。於是垂衣裳造書契。作爲舟車網罟弧矢杵臼之器。載在易經。不可誣也。凡可以前民用者。聖人無不爲之。而況於醫乎。辨陰陽於毫毛。決死生於分寸。其用心之難。又豈直舟車網罟弧矢杵臼而已哉。吾固有以知其作於神農黃帝無疑也。此言極是。芸窗私志。至謂神農聞獸語而知藥。怪誕極矣。

先天後天

先天後天。在易則不過論大人之德矣。而干寶周禮注云。伏羲之易小成。爲先天。神農之易中成。爲中天。黃帝之易大成。爲後天。似無謂焉。迨至宋儒。以伏羲之易爲先天。以文王之易爲後天。遂作之圖。最無謂也。元明以來。醫家亦立元氣先後天之目。牽強殊甚。然其理則固有焉。經云。真氣者所受於天。與穀氣并而充身也。

三陰三陽

太少陰陽。原是四時之稱。董仲舒云。春者少陽之選也。夏者太陽之選也。秋者

少陰之選也。冬者太陰之選也。易乾鑿度云。易始於太極。太極分而爲二。故生天地。天地有春秋。冬夏之節。故生四時。虞翻解易則云。四象四時也。而後世說易者。專用此論著策之數矣。以陽明厥陰。合稱三陰。三陽者。醫家之言也。靈樞云。兩陰交盡。故曰厥陰。王冰注。素問云。厥。盡也。按厥。厥同。漢食貨志。師古注。厥。盡也。又按。晏子云。陰。冰。厥。陽。冰。厚五寸。厥字。蓋與此同義也。兩陽合於前。故曰陽明。而後世運氣家。強以此爲天之六氣矣。

內經之文似諸書

余嘗著素問解題一篇。論其爲漢人之作。證以前賢之數說。頃刀圭之暇。繙繹子史。文間有與此相似。古人雖不必剽襲。然足觀時世之所以令然。茲舉其二。以證非典謨以前之筆矣。上古天真論云。美其食。任其服。樂其俗。老子十八章云。甘其食。美其服。安其居。樂其俗。又云。以酒爲漿。漢書鮑宣傳。漿酒藿肉。四氣調神論云。渴而穿井。戰而鑄兵。晏子春秋云。臨難而遽鑄兵。噎而遽掘井。陰陽應象大論云。因其輕而揚之。因其重而減之。因其衰而彰之。呂氏春秋盡數篇云。精氣之來也。因輕而揚之。因走而行之。因美而良之。陰陽別論云。一陰一



陽結。謂之喉痹。春秋繁露云。陰陽之動。使人足病喉痹。六節藏象論云。立端於始。表正於中。推餘於終。而天度畢矣。文元年左傳云。先王之正時也。履端於始。舉正於中。歸餘于終。又云。草生五色。五色之變。不可勝視。草生五味。五味之美。不可勝極。孫子兵勢篇云。聲不過五。五聲之變。不可勝聽也。色不過五。五色之變。不可勝觀也。味不過五。五味之變。不可勝嘗也。此語又見文子脈要精微論云。陰盛則夢涉大水。恐懼。陽盛則夢大火。燔灼。陰陽俱盛則夢相殺毀傷。上盛則夢飛。下盛則夢墮。甚飽則夢予。甚饑則夢取。列子穆王篇云。陰氣壯則夢涉大水而恐懼。陽氣壯則夢涉大火而燔灼。陰陽俱盛則夢生殺。甚飽則夢與。甚饑則夢取。氣穴論云。發蒙解惑。未足以論也。枚乘七發云。發蒙解惑。未足以言也。營衛生會篇云。上焦如霧。中焦如漚。下焦如瀆。白虎通引禮運記云。上焦如竅。中焦如編。下焦如瀆。本神篇云。生之來。謂之精。兩精相搏。謂之神。隨神往來者。謂之魂。並精而出入者。謂之魄。所以任物者。謂之心。心有所憶。謂之意。意之所存。謂之志。因志而存變。謂之思。因思而遠慕。謂之慮。因慮而處物。謂之智。此一節全

見子華子。其他文勢語氣。類淮南者多。聶吉甫云。既非三代以前文。又非東都以後語。斷然以爲淮南王之作。豈其然與。

巫醫

人而無恆。不可以作巫醫。蓋巫醫唯是醫已。周禮有巫馬。卽馬醫。汲冢周書。鄉立巫醫。具百藥以備疾災。畜五味以備百草。呂覽云。巫醫毒藥。逐除治之。故古之人賤之。爲其末也。後漢許楊及王莽篡位。乃變姓名爲巫醫。逃匿他界。皆非巫與醫之謂。山海經開明東有巫彭。巫抵。巫陽。巫履。巫凡。巫相。郭璞注云。皆神醫也。世本曰。巫彭作醫。楚辭曰。帝告巫陽。又呂氏春秋。巫彭作醫。世本。巫咸。堯臣也。以鴻術爲帝堯之醫。說苑云。上古之爲醫者。曰苗父。苗父之爲醫也。以菅爲席。以芻爲狗。北面而發十言耳。請扶而來。輿而來者。皆平復如故。素問有移精變氣論。上古之醫。必爲祝由。則所以有巫醫之稱也。

伊尹湯液

皇甫謐甲乙經序云。伊尹以元聖之才。撰用神農本草。以爲湯液。蓋伊尹負鼎。



言貢才也。乃謂庖人。遂作湯液。原出于卮寓。而後人取附會耳。素問有湯液醪醴論。俞跗治病。不以湯液醪醴。並非湯藥之謂。而漢書藝文志。湯液經法十六卷。豈伊尹所作耶。活人書。桂枝加葛根湯方。後云。伊尹湯液。桂枝湯中加葛根。今監本用麻黃。誤矣。又衛生寶鑑。伊尹湯液論云。大黃黃連瀉心湯三味。今監本無黃芩。脫落之也。所謂湯液。雖今無傳。其出於後人依托明矣。

醫學

晉以上無醫學之設。及劉宋元嘉二十年。太醫令秦承祖奏置醫學。以廣教授。後魏及隋。有太醫博士助教。唐貞觀三年九月。諸州置醫學。開元元年。諸州置助教。十一年。諸州置醫學博士。宋醫學隸太常寺。神宗時始置提舉判局官。及教授一人。學生三百人。政和五年正月。州縣置醫學。元世祖中統二年夏五月。太醫院使王猷吉言。醫學久廢。後進無所師授。竊恐朝廷一時取人。學非其傳。爲害甚大。乃遣副使王安仁。授以金牌。往諸路設立醫學。吳澄宜黃縣三皇廟記云。醫有學。學有廟。廟以祀三皇。肇自皇元。前所未有也。夫上古聖人。繼天心



立民命。開物創法。以爲天下利。至于今賴之者。莫如三皇也。然歷代以來。未聞立廟以祀。唐天寶間。制立三皇廟。與五帝廟同置。命有司以時祭享。蓋曰祠古聖云爾。非如今日醫學之專廟特祭也。當今路州府縣儒學。有孔子廟。皆因其舊。醫學立三皇廟。與儒學孔子廟等。則新制也。乃知醫學之制。至于元而始備矣。明初置醫學提舉司。設提舉副提舉醫學教授學生官醫提領等官。尋改爲太醫監。設少監監丞。吳元年。改監爲院。設院使同知院判典簿等官。而各地醫學府正科一人。州典科一人。縣訓科一人。然似不如元之重醫學也。故丘濬大學衍義補云。今世之業醫者。挾伎以診療者有之矣。求其從師以講習者何鮮也。我太祖內設太醫院。外設府州縣醫學。醫而以學爲名。蓋欲聚其人以數學。旣成功。而試之。然後授以一方衛生之任。由是進人。以爲國醫。其嘉惠天下生民也至矣。臣願究成周所以謂之醫師。國朝所以立爲醫學之故。精擇使判以上官。聚天下習醫者。俾其教之養之。讀軒岐之言。研張孫之技。試之通而後授之職。因其長而專其業。稽其事以制其祿。則天下之人。皆無夭閼之患。而躋仁

壽之域矣。是亦王者仁政之一端也。今依此言而推之。當時醫學之衰廢。可以知也。而嘉靖十五年。建聖濟殿于文華殿後。以祀先醫。二十二年。從待醫之請。又建景惠殿于太醫院。以祀先醫。令大臣春秋主祀。蓋未始於醫學建三皇廟也。清因之。雍正元年。覆准行文直省巡撫。查所屬醫生。詳加考試。課有類經註釋。本草綱目。傷寒論三書者。指名題請。授爲醫學官教授。每省設立一員。准其食俸三年。如果勤慎端方。貢入太醫院。授爲御醫。凡所屬州縣衛習醫人。令其訪明考試。即將三書教習。有精通醫理者。呈報巡撫。給咨太醫院考試。上者授以吏目醫士等官。其有年力不能赴京者。留爲本省教授。待缺。其致祭三皇於太醫院之景惠殿。順治元年定。儀註詳出會典然醫學之制。未得其詳。享和癸亥冬。蘇門民醫胡振兆新來寓於崎嶇。因使譯官問之。胡乃覆曰。儒學者設立教官。專管在學諸生。衙署學宮之傍。凡讀書人。考取秀才。則知府知縣送入學內。教官迎進拜孔聖。後卽拜教官爲老師。所謂進學之稱也。醫學者不過本地醫家。寒士寂寞。官長強點充任。雖名醫官。實以備承應傳喚。兼治罪犯之人。每年俸穀

無多。仍可在家診治。並無學宮。亦不課教子弟。蓋閭閻醫士。一切衙門。俱不承應。俱讀書人爲多。官長延請。須用名帖。所以醫學之不屑爲也。三皇廟者。寺院也。非學也。有道士承應供奉。醫家朔望進香。此蓋就蘇門一地而言之。如兩直隸。恐不如此也。

三皇廟

洪武四年詔曰。三皇繼天立極。開萬世教化之原。汨於藥師可乎。天下郡縣。毋得褻祀。而至嘉靖二十二年。建三皇廟於太醫院北。名景惠殿。又至隆慶四年。禮部侍郎王希烈建言。三皇既祀于歷代帝王廟。又祀于文華東室。乃又雜之醫師。使共俎豆。不亦瀆且褻乎。且官廨中止宜有祠。不宜有殿。穆宗不欲改先帝之制。報罷。萬曆十八年。詹景鳳修南京太醫院三皇廟。謂三皇之稱。於醫無取。更額曰聖醫廟。事詳于其所彙刻醫學集覽序。按聖醫廟之稱。爲協其實焉。然今清朝。猶仍元明之舊制。

醫科